

## XXIX *Xornaes Internacionales d'Estudiu* de l'Academia de la Llingua Asturiana



L'Academia de la Llingua Asturiana celebró a primeros del mes de payares, los días 2, 3 y 4, nel Salón d'Actos de la Facultá de Filosofía y Lletres nel Campus d'Humanidaes n'Uviéu, les sesiones de les *XIX Xornaes Internacionales d'Estudiu*.

Organizaes en ponencies y comunicaciones, como davezu, les *Xornaes* cuntaron nesta edición con una sesión especial: l'homenaxe institucional de l'Academia al que foi, de magar la so creación y hasta xineru de 2001 el so presidente, el caderalgu de la Universidá d'Uviéu Dr. Xosé Lluis García Arias, al cumplir 65 años.

Esti actu d'homenaxe féxose na sesión del miércoles día 4, presidiendo con esti motivu la mesa de les *Xornaes* el Decanu de la Facultá de Filosofía y Lletres, Dr. *Jesús Peláez*, la Presidenta de l'Academia, Dra. *Ana M<sup>a</sup> Cano* y el Rector de la Universidá d'Uviéu, Dr.

*Vicente Gotor*. Tolos tres glosaron nes so intervenciones la trayeutoria profesional y académica y la llarga y granible obra filolóxica del Dr. García Arias. La Presidenta de l'Academia presentó y ufiertó darréu al homenaxáu les tres publicaciones que l'Academia asoleyó pa la celebración: *Llingua y sociedá asturiana* (edición facsímil); *Toponimia de Teberga* (que recueye los sos trabayos de toponimia tebergana asoleyaos en destremaes publicaciones) y *Homenaxe al profesor Xosé Lluis García Arias*, obra en dos tomos con un total de cincuenta y cinco trabayos ufiertaos por académicos, investigadores y profesores universitarios d'Asturies, España, Europa y América al caderalgu asturianu (cfr. «Librería Asturiana», pxs. xxx-xxx d'esti volume). Cuatro d'ellos foron los qu'interviniéron nes sesiones d'esi día 4, presentando les sos ponencies de collaboración nel homenaxe, inxertes trés d'elles nel citáu volume: *Gerold Hilty* (Universidá de Zürich), «¿Existió en la lengua del s. XIII un pronombre personal *iolia* con la misma función que *gelolgela*?»; *Dieter Kremer* (Universidá de Trier), «(R)espigando en la documentación altomedieval de León» (cfr. pxs. 15-45 d'esti volume); *Jean Germain* (Universidá Católica de Louvain), «Les termes génériques à base dialectale dans l'odonymie officelle de Walonie» y James Fernández McClintock (Universidá de Chicago), «Sobre la 'Dignificación de la historia' y el Peso de las Categorías».

El restu les sesiones cuntó coles intervenciones de:

- **Martes, día 2:** Ponencia de *Miguel Ramos Corrada* («Los personaxes femeninos nel teatru asturianu») y comunicaciones de *M<sup>a</sup> Cristina García García, Santiago Fano Menéndez, Francisco Fernández-Guisasola & Joaquín Fernández, Xosé Martínez & Xuan Xosé Lastra & Joaquín Fernández, Elisabeth Felgueroso López, Xosé Ramón Iglesias Cueva.*

- **Miércoles día 3:** Comunicaciones de *Xosé Lluis García Arias, Xabiel Fernández García, Ángel Fdez. Barredo & José Antonio Longo Marina, Cristina García-Sampedro Clérigo, Pablo Suárez García, Rubén Fernández Martínez, M<sup>a</sup> del Mar Martín Martín y Marta Mori d'Arriba.*

### ***Nuevu llar de l'Academia de la Llingua Asturiana***

Según dábemos anuncia nel número 103 de *Lletres Asturianas* (ochobre 2010, páx. 144) l'Academia de la Llingua Asturiana treslladó'l so llar oficial dende la Calle Santa Cruz, onde tuviere asitiada de magar 1983, al n<sup>o</sup> 10 de la Calle L'Águila, nel recintu del Conventu de San Pelayo nel cascu históricu de la ciudá d'Uviéu.

A la inauguración oficial del nuevu llar asistieron el Presidente del Principáu d'Asturies, D. Vicente Álvarez Areces, la Consejera de Cultura, D<sup>a</sup> Mercedes Fernández, la Direutora Xeneral de Política Llingüística, D<sup>a</sup> Consuelo Vega, y otres autoridaes. Na rueda de prensa convocada con esti envís intervinieron el Presidente del Principáu y la Presidenta de l'Academia.

### **XXIV Conceyu Internacional d'ICOS**

El XXIV Conceyu Internacional d'ICOS sobro Ciencies Onomástiques fairáse en Barcelona del 5 al 9 de setiembre de 2011.

L'Academia de la Llingua Asturiana sofita y amiéstase al referíu Conceyu como institución participante. Pa más información dir a: <http://barcelona.onomastica.cat/es/>.

### ***Premios «Andrés Solar» de la Xunta pola Defensa de la Llingua Asturiana***

La XPDLLA entregó'l día 18 d'avientu, nel Salón d'Actos del Antiguu Institutu Xovellanos de Xixón los premios «Andrés Solar 2010», qu'algamen esti añu la so XXVI edición. El 'Pegollu' concedióse esti añu al equipu del programa de la TPA *Camín de cantares*, como reconocencia al «usu que fai de la llingua asturiana esti programa, nun exemplu de normalidá y puesta en valor de les nuestres señes

d'identidá». El 'Madreñazu' foi pal Conseyeru d'Educación al que, «como responsable máximu na Conseyería d'Educación y Ciencia, la Xunta topa delles razones poles que castigalu con esti premiu».

## Convocatories de concursos

### «VII Concursu de Microrellatos de Pesca»

- *Entamen*: Conceyu de Salas, ASTURPESCA, PRODER del Baxu Nalón y CEDER Valle del Ese-Entrecabos.
- Convócase'l «VII Concursu de Microrellatos de Pesca» na celebración de la XIII Feria del Salmón, en llingua castellana y en llingua asturiana y con dos categoríes:
  - Hasta los 14 años (*Esguín*)
  - De 15 años n'adelantre (*Salmón*).
- Almitirásen namái un microrellatu per participante y el conteníu tendrá que centrarse nel mundu de la pesca, nun pudiendo perpasar les 300 pallabres nin los 2.200 carauteres. Hai qu'unviar los orixinales per quintuplicáu, impresos per una sola plana y en fueya DIN A4 nun sobre onde se conseñe la categoría y acompañaos de la plica correspondiente. El plazu de presentación pieslla'l día 4 d'abril de 2011.
- *Información y Bases*: Secretaría Técnica Feria del Salmón, Asturpesca 2011. Plaza del Ayuntamiento n<sup>o</sup> 2 – 33860 Salas.

### «IV Premiu Arbidel de Cuentos Eróticos»

- *Entama*: Conceyu de Ribeseya. Conceyalía de Cultura.
- Almitirásen namái un rellatu per participante, nun pudiendo perpasar el so llargor los ochos folios mecanografíaos a doble espaciu, per una sola plana. La temática sedrá de calter eróticu. Hai qu'unviar los cuentos nun sobre onde se conseñará'l nome del premiu. Dientro esti sobre, amás del orixinal del cuentu y tres copies, dirá otu cola plica del autor y el títulu del cuentu escritu pela parte d'afuera. El plazu de presentación pieslla'l día 8 d'abril de 2011.
- *Información y Bases*: Conceyalía de Cultura. Plaza María Cristina 1 – 33560 Ribeseya.



**6 de mayu de 2011**

\* \* \*

***XXXII Día de les Lletres Asturianes***

**L'Academia de la Llingua Asturiana celebrará esti día como  
davezu y fai brinde a toos y toes pa que per toa Asturias  
s'entamen actos**